

Informashon Seksual ta Hasi Falta

Bibando den un era ku nos ta bombardiá ku informashon i insinuashonnan seksual diariamente, ta parse un kontradikshon pa bisa ku tòg informashon tokante seksualidat ta hasi falta.

No ta un falta di informashon anatómiko. Alumnonan na skol ta ser siñá tokante e kurpa i e órganonan reprodutiv. Tampoko no ta un falta di informashon pa ku antikonseptivo. Hóbennan sa tokante kondom i nan sa unda nan por haña. E falta di informashon ta sinta serka nos ku ta mayor.

Tempu nos tabata mucha, seksualidat tabata un tópiko tabú. E palabra "sèks" NUNKA a ser mensioná. Komo resultado hopi di nos a lamta ku e impreshon ku sèks ta algu malu, sushi, òf vulgar. P'esei, hopi mayor awendia te ainda tin bèrgwensa pa papia tokante seksualidat. Nan ta fris, blos, bira tur nèrvioso, kuminsá gaga ora un yu ta hasi un simpel pregunta manera: "Di unda mi a bin?" "Kon un beibi ta nase?" "Kiku e kos ei ta?" Komo resultado, mayornan ta renunsiá nan responsabilidat pa yuda nan yunan desaroyá un pèrspektiva sano pa ku nan propio seksualidat i e sekso opuesto.

Ta bèrdat ku alumnonan ta haña lès di edukashon seksual na skol awendia. Ma e motibu ku un "eksperto" ta bin duna charla tokante seksualidat na skol ta pasobra tantu mayor no ta hasi esaki. I awor, algun mayor tin e kreensia eronio ku EKSPERTONAN so por duna edukashon seksual i ku esaki mester sosodé NA SKOL.

Ta tempu pa mayornan tuma bèk e responsabilidat ku nan a renunsiá. Ta tempu pa mayornan realisá ku ta importante pa NAN MES siña nan yunan tokante seksualidat. Pakiku?

1) Pasobra edukashon seksual (si nos ta realis'é si òf nò) ta kuminsá fo'i chikitu...den kuna. Aktitut di e mama i tata ora ta baña i kambia bruki di e beibi ta algu ku e kriatura lo kapta, i lo influensia su aktitut. I ora e ta kuminsá papia, e lo hasi pregunta...tokante TUR KOS. E ta interesá den su propio kurpa, i ta kuminsá nota diferensianan entre su kurpa i esun e sekso opuesto. No ta sano pa keda sin kontestá su preguntanan te ora e ta hasi 11 òf 14 aña.

2) Muchanan ta kurioso. Si abo no ta duna nan informashon, nan lo buska pa haña sa. Nan lo busk'é di un amigu, un revista pornográfiko, un chiste vulgar, dikshonario, èts. Nan ta buska dor di eksperimentashon seksual (algu ku ta sosodé ku ménos frekuensia serka muchanan ku ta informá). Kontestando nan preguntanan no ta eliminá nan curiosidat, ma e ta eliminá e nesidat di un investigashon sekreto, eksperensianan inesesario, i konklushonnan kiboká.

3) Edukashon seksual na kas por ser presentá di un punto di bista moral, loke no ta e kaso tur ora na skol. Hopi bes e alumno no ta ser bisá kiku e mester hasi pa ku e informashon tokante seksualidat ku e ta haña; e no ta bias kiku ta bon i kiku ta malu. Sin esei, e edukashon seksual por stimul'é pa purba sèks pa su mes. Ta un echu tristu ku edukashon seksual fuera di un konteksto moral ta ENKURASHA inmoralidat.

Nos no mester pensa ku edukashon seksual na kas ta un charla formal ku mayornan ta duna nan yunan na siertu edat. En realidat e edukashon informal aki ta tumando lugá dia tras dia. Normal, si bo ta mantené un aktitut habrí, e yu mes lo trese e tópiko dilanti. Ora e ta hasi pregunta, kontestá su pregunta. Esei ta e momentu ku e ta kla pa siña. Splika na su nivel di komprendementu i interes. Demasiado informashon ta bruh'é. I kòrda, yama e parti di kurpa na su nòmber korekto. No inventá palabra kreativo pa penis, vágina, ano, èts. Sigur no usa e palabranan vulgar pa e kreashon spesial di Dios.

Beibel ta bisa ku e kurpa humano ta "trahá na un manera formidabel i maraviyoso" (Salmo 139:14). Dios a krea e dos seksonan i a bisa nan "sea fruktifero i multipliká" (Génesis 1:26-28). I segun Skritura santu, dentro di matrimonio, relashon seksual ta algu bon (Hebreonan 13:4). Si tur esaki ta bèrdat, pakiku mayornan mester tin tantu bèrgwensa pa eduká nos yunan?

Ta tempu pa mayornan pone nan bèrgwensa un banda i aseptá e privilegio di duna nan yunan informashon korekto, sano, i moral tokante seksualidat. Pasobra si mayornan no ta hasié di e forma aki, otronan lo hasié...anto na NAN manera!